

maghet en hoer pijn wort vernijet we
 der ende sie ghenck setten by den cruce
 ende sprack totten ridders aldus myt
 oetmoedich^e myt ghebughede kneen
 myt gheuolden handen. myt drouige
 ansichte myt heesscher stemmen **W** ghy
 manen mine vrienden ick bidde v om
 den ouersten god dat ghy my niet
 meer en moeyt want ick syn syn be
 droeuede moeder en ghy mijn lieue
 broeders weten wal dat ick v niet en
 hebbe veruoert **A**l schijnt dat my
 lieue soene v en teghen heft ghewest
 ghy hebt hem doch ghedodet en ick
 hebt v gheerne ghehenghet **I**ck bid
 de v latet my hem begrauen wat te
 is gheen noet dat ghy hem die bene
 breken wat hie is doch al doet ende
 dat is een guede wijle gheleden dat
 hie sterff **D**oe desen woerden ofleten
 die ridders meer een houerdich rid
 der van name Longinus die nochtan